



大明宣示章皇帝實錄

宣德三年八月庚辰朔

辛巳

賜湖廣唐崖長官司故土官長官黃晟子敏前歸  
德宣撫司等衙門故土官宣撫彭驢送子萬隆等  
容美宣撫司通事向錦等鈔綵幣表裏絹有差  
上御武英殿問侍臣歷代戶口盛衰侍臣對曰萬平  
水土民奠厥居至桀而耗之湯始受命視禹時不  
及及紂淫虐武王得天下之初視湯得時又不及成  
康致理遂多於禹時春秋戰國以致羸秦所耗尤多

漢高至文景民庶大增武帝征伐不息十數年間  
天下之衆亦減其半昭帝罷戰務農至成帝初戶  
口極盛東漢承王莽之後率土之民十絕二三明  
章之後天下無事人口滋植三國六朝疆宇分裂  
所存無幾隋文節險天業之初戶口極盛煬帝荒  
淫役人以百萬計丁男不足役及婦人由是天下  
之人聚而為盜唐貞觀以後及于永徽戶口日增  
至開化元極盛安史之亂遂大耗矣宋承五季之  
後自太祖至神宗戶口日盛高宗南渡中原板蕩  
所存者東南之民此歷代戶口大槩也

上曰戶口之盛衰足以見國家之治忽其盛也本于  
休養生息其衰也必由土木兵戈觀漢武承文景  
之餘煬帝繼隋文之後開元之盛遂有安史之亂  
豈非恃其富庶而不知儆戒乎漢武後末年乃知  
悔過煬帝遂以亡國玄宗至於播遷皆足為世之  
大戒

壬午

皇子祁鈺生

上之第二子也 賜占城國使臣連沙怕濟加等鈔  
絲幣表裏金織紵絲羅絹襲衣有差命賫勅及紵

絲紗羅絨錦歸賜其主及妃 修居庸關城及水門

命行在工部侍郎許廓督之 貴州興隆衛經歷陸昇言本衛官軍俸糧計二萬餘石除收四川播州等處稅糧支給外餘於重慶等府支相去二十八駟皆高山峻嶺不通舟楫每歲差官總支變易物貨回衛給與官軍所得十不及一本衛去湖廣徧橋鎮遠二衛陸行止一百二十里即通舟楫下至沅州派州總十一駟俸糧乞於彼支給為便 命行在戶部議行之

癸未

前晉王濟熹奏欲親詣晉恭園祭掃且訴濟熹之惡

上復書曰恭園祭掃此伯王孝心亦禮所當然今親詣之後來歲可令平陽王兄弟代行蓋慮伯王<sup>春</sup>秋春高道遠跋涉非易也濟熹所為不孝不忠不恭不仁彘豕之行久而愈甚鬼神不容暴蕩其奸善惡之施其應如響可謂天理久而定矣因伯王言及猶使人不能無慨于心也 賜朝鮮國使臣元閔生等及奉使迤北還回官軍袁亨等鈔紵絲絹

衣等物有差。薊州守備都督僉事陳景先奏喜峰口等處守備官軍月糧俱于遵化衛林南倉支往復四百餘里或時遇雨山溪水漲半月方可回營設有緊急何以應援乞于秋成後發附近永平府屬縣民及東勝諸衛軍運林南倉糧遵化城內倉收儲以備支給庶官軍得專守備

上從之

命行在戶部遣官以九月終發軍民兼運歲以為常行在都察院左副都御史陳勉左僉都御史李濟右僉都御史凌晏如監察御史繆如讓行在大

理寺石少卿王文貴評事陳永祥諸哱坐失出死罪下獄先是龍驤衛千戶劉廣劉震王文坐寇軍糧以監守自盜論應死廣等懼死妄訴冤勉等遂改論杖罪

上謂三法司臣曰廣等從重入輕若今所擬是則前之所擬亦不得無罪爾等再推究其實以聞至是三法司奏審其情實於法應死遂命下勉等於錦衣衛獄尋命宥之北京東城兵馬司提奏大寧前衛致仕指揮使把事騎馬過市馬驚啼折人右足請送法司問罪

上曰乘馬傷人雖非故殺傷肢體亦不得無罪令醫療平復則免之  
南京都察院右都御史兼事詹府詹事致任尚寶卒寶字克忠江西進賢人洪武乙丑進士初授兵部試員外郎九年無過特陞通政使以不善奏對力辭改應天府戶建文中坐累謫廣西

太宗文帝皇入正大統召復前職又坐累繫獄數年左遷兩浙鹽運司判官

仁宗皇帝在東宮知其廉既即位驛召還朝陞都察院右副都御史翌日入謝命兼詹事府詹事給兩

俸有詔求言寶陳八事其一曰錄用勲舊二曰設置諫官三曰選舉賢才四曰簡練將帥五曰貴重有司六曰考覈吏員七曰監生資格八曰疏通鈔法言亦可采上即位之初命蒞南京都察院秩滿入覲

上憫其老疾命致仕歸卒於道訃聞遣官賜祭命有司治塋寶濡者有文學寬厚愛民而持身清介累遭困厄未嘗易操平居言不及利蔬食水飲自處甚適歷仕四十餘年卒之日家具蕭然

甲申

命遼東都指揮同知夏俊李信復視事先是有言  
俊等罷軟弗稱命致仕以其子襲舊職至是

上察其尚可用故有是命 監察御史鄭道寧言四  
事其一宣德元年秋都察院右都御史王彰嘗奏  
京倉官吏入等收支作弊有旨命犯者即治之然  
後奏既又命戶部必奏然後治之近神策等衛倉  
官吏作弊事覺因候奏請各官愈肆奸弊乞如彰  
所奏命庶使奸貪畏憚民不受害其二囚人納米  
贖罪乃朝廷寬恤之典近見軍儲倉拘繫罪囚貧  
無米輸納自去年十二月至今死者九十六人有

負

皇上好生之意比者刑部侍郎俞士吉嘗奏罪之貧  
無米者請追納於原籍區仍輸作軍仍操備若非  
軍區則皆遣還所隸州縣追之乞舉以而行庶使  
刑用法平恕人得全生其三犯姦婦女律當去衣受  
納者拘繫於獄益縱淫穢有傷風化乞勅法司仍  
治之如律庶使人知懲戒其四在京各衛鎮撫倉  
官職專出納錢糧比見鎮撫每日早赴都督府書  
卯倉官三日一赴戶部五日一赴本衛謁見往來

伺候虛費日時遂使納者停積闕者稽留實為誤  
事乞戶部禁止

上皆從之惟干問軍職仍先具奏 遼東安樂州知  
州候進奏臣奉命赴任携家以行經山海關已給  
行後軍都督府出關勘合守關指揮葛昇等稽留  
不遣必索取賄賂始得放行凡經過者皆<sup>苦</sup>其貪  
暴請罪之

上諭右都御史顧佐等曰朝廷設關本以禦暴今反  
為暴其令巡按御史治之如律

丁亥

遣太子少傅工部尚書兼謹身殿大學士楊榮釋  
奠先師孔子 昏刻有流星大如鷄彈色青白有  
光起箕西南行至雲中

戊子

祭

太社

太稷

己丑

謫降監察御史嚴暄等先是

上以御史多不稱職勅右都御史顧佐明慎簡擇凡



貪汙及不諳改體與老疾者具以明聞佐奏監察  
御史嚴暄成林韓瑄繆讓張衡趙瑛趙礪趙倫楊  
居正宋準張士貞司務段凱貪淫無耻汙名尤甚  
張觀王成雷恭王諭司鋒胡曄潘奉年倫貪汙不  
律李孟瑄王順蔡寧吳鋒張瑩林真張嘉會都事  
趙玘不達改體趙安不諳文移馮斌梁毅周珣老  
疾俱宜出降

上命貪淫不律者發遼東各衛充吏終身不達政體  
者降縣典史老疾者罷為民夜有流星大如鷄  
彈色赤尾跡有光出天倉南行至濁

庚寅

阿倫等衛女直指揮僉事亦省哥等來朝貢馬及  
方物

命都指揮使花英仍任廣東都司調廣東都指揮使  
李龍任福建都司英舊任廣東有罪調交趾比還  
命守廉州至是官軍調廉州衛者皆賜歸原衛故  
英亦復舊任

命南京守備太監鄭和王景弘等以內府見貯大絹  
十萬疋綿布二十三萬疋令戶部遣官軍運北京  
命故崇信伯費璫子劉猷爵行在都察院右都御

史顧佐奏監察御史多缺臣訪奉進士鄧榮等十  
四人監生陳富等十一人聽選教官方瑞等二十  
人志操端謹堪任御史

上曰風憲固當用端謹者亦須有才猷方稱未可遽  
授此職俱令于各道歷政三月尔察其言行考其  
賢否第為三等朕將選擇任之 行在禮部胡濙  
奏交趾土官知州阮得奉百戶丁射及州判縣丞  
訓導吏典等以公差考滿了憂同妻子家人還交  
趾者中途聞一師已還而賊透城皆不願歸具告  
有司遞送來京願就京住

上命各與房屋依品級支俸無俸者月給食米一石  
故官家人月給食米五斗濊又奏先次交趾土官  
指揮武孝先及知州等官願在京住者賜銀鈔絲  
幣絹布

上命准此例 修薊州玉河橋令守備都督陳景先  
以附近軍民工匠同修 湖廣常德府奏龍陽武  
陵二縣五月以來霖雨不止湖水漲漫衝決堤岸  
漂流民居湮沒田苗命布政司委官撫恤

辛卯

革北京行後軍都督府及行部永樂初建北京置

行後軍都督府行部及遷都北京置五府六部皆  
如南京行都督府行部猶存凡五府六部文移合  
行北京直隸衛所府縣者及直隸衛所府縣申達  
五府六部者必經行都督府行部文移重復事或  
稽誤

上命公侯伯尚書都御史學士議於是英國公張輔  
吏部尚書蹇義等言北京既有五府六部大小衙  
門其行府行部宜革  
上從之命掌行後軍都督府事駙馬都尉廣平侯袁  
容掌行後軍都督府行部尚書李友直改行在工

部侍郎李昶改行在戶部李嘉改行在禮部特命  
蘇瓚致仕凡首領官屬官及吏命吏部改調行  
在刑部奏監察御史高昭犯贓罪應死然今恩  
例當運磚贖罪復職

上曰犯贓豈可復任風憲其罷為民

壬辰

金吾右衛指揮僉事脫寔自陳年老命其子脫歡  
代職隨清平伯吳成巡邊免山東萊州府掖縣  
逃徒充軍死亡等戶洪熙元年至宣德二年稅糧  
米麥一千二百八十五石

癸巳

上御秦天門召公侯伯五軍都督府都督諭之曰胡虜每歲秋高馬肥必擾邊北來邊備不審何以東北諸閔隘皆在畿內今農務將畢朕將因田獵親歷諸閔警整兵備卿等整齊士馬以俟

甲午

進士魏瑛言臣比因戶部遣徵松江府秋糧切見在京諸司每有公事輒差官督辦紛紜交集一郡之間凡數百人謹恪者止多費廩給貪酷者動輒虐害軍民府縣官吏所差人衆視為泛常

公務稽遲往往違限乞勅六部都察院等衙門惟巡視水旱觀察民風切要之事差官凡買辦催徵令移文府縣量立程限赴京輸納且令巡按監察御史按察司官以時校勘稽誤者罪之庶官事易集下人獲安

命行在禮部會官計議行之北京行部右侍郎蘇瓚致仕陞辭

上顧謂尚書蹇義曰瓚貪鄙以阿諂進不可以玷朝行故特罷之蓋瓚直隸河間縣人初為縣丞陞工部主事再陞郎中洪熙初陞侍郎瓚頗有才幹不

癸巳

上御秦天門召公侯伯五軍都督府都督諭之曰胡虜每歲秋高馬肥必擾邊北來邊備不審何以東北諸閔隘皆在畿內今農務將軍朕將因田獵親歷諸閔警整兵備卿等整齊士馬以俟

甲午

進士魏琰言臣比因戶部遣徵松江府秋糧切見在京諸司每有公事輒差官督辦紛紜交集一郡之間凡數百人謹恪者止於多費廉給貪酷者動輒虐害軍民府縣官吏因京師所差人衆視為泛常

公務稽遲往往違限乞勅六部都察院等衙門惟巡視水旱觀察民風切要之事差官凡冒弊催徵悉令移文府縣量立程限赴京輸納且令巡按監察御史按察司官以時校勘稽誤者罪之庶官事易集下人獲安

命行在禮部會官計議行之北京行部右侍郎蘇瓚致仕陞辭

上顧謂尚書蹇義曰瓚貪鄙以阿諂進不可以玷朝行故特罷之蓋瓚直隸河間縣人初為縣丞陞工部主事再陞郎中洪熙初陞侍郎瓚頗有才幹不

識廉耻巧於迎合諂事黷交當道者薦之故得不  
次之擢及罷朝議皆服

上之明云 夜月食

乙未

命英國公張輔陽武侯薛祿等簡閱京衛軍士

勅畿內諸衛選精銳官軍扈從

勅薊州以東諸衛整備士馬以俟扈從

命成國公朱勇掌行在前軍都督府事命故永清右

衛指揮僉事李致子瑄襲職

命行在刑部尚書兼太子賓客金純致仕落賓客之

職純鳳陽泗州人洪武中為吏部文選郎中後陞  
江西叅政入為刑部侍郎轉禮部陞尚書轉刑部  
遂兼賓客純寬厚有容初無過舉比遭疾

上賜醫藥稍愈入謝免朝謁令護疾視事時夏暑

勅三法司疏決滯囚純不加意教從朝貴宴飲致

獄淹滯為御史給事中所劾命錦衣衛繫之至是

上念其舊人且老特宥之命致仕一行在兵部尚書

張本秦谷處守閔隘官軍及巡檢職在盤詰奸詐

擒捕盜賊今皆怠惰近內使及軍囚逃者未嘗捕

獲一人請揭榜戒諭自今凡軍民無文引及內官

內使來歷不明有藏匿尋覓廢院者必執送官仍  
許諸人首告得實者給賞里長隣人縱容不首者  
與犯人同罪從之給嘉興公主及駙馬井源歲祿  
共二千石給崇信伯費劉歲祿一千一百石於南  
京倉米<sup>夢</sup>無支以九年考最陞行在山東道監察  
御史朱仲安為河南按察使戶部員外郎黎璿為四  
川布政司左叅議四川按察司僉事于庭駒為山  
東按察司副使陝西道監察御史高翔廣東布政  
司左叅議汪淵俱以疾命冠帶閑居雲南太和縣  
學訓導楊智九年考滿自陳臣本雲南人任本土

教官今當改除切念臣父母皆老乞復原任以祿  
為養

上念其情命行在吏部從之點雲南道監察御史霍  
萃為慶雲縣知縣降福建按察司僉事徐隆為沐  
陽知縣萃以受賄事覺未結正雖遇赦仍黜之隆  
以巡按御史言其不任職故降之以交趾民陳汀  
為指揮僉事汀交趾古雷縣把魯千里長夫從都  
督方正及指揮阮安榮戰守汀能効勞動數敗黎  
利有奇功正信任之王通棄城汀憤恨北行為賊  
所得賊吐其為人受偽正督令率兵守交州東閩

汀義不事賊挈家九十餘口從間道出走利遣人  
追之家口為賊所獲惟汀得至欽州都指揮程瑒  
遣送至京

上謂尚書張本曰其人久在行伍効勞力又能舍賊  
歸朝誠悃可嘉宜有超擢其以為指揮僉事于錦  
衣衛支俸令禮部依交趾土官居京師例給賜以  
遵化衛夜不收張大川為本衛百戶初大川與守  
上鮎魚石關巡至將軍樹石關口猝遇虜騎四人身  
之敵虜被大川射傷俱棄馬走邊將以聞召大川  
至京師詢其實

上嘉其勇故有是命

丙申

湖廣施州衛前鎮邊忠信宣撫司等衛門故土官  
同知黃阿什用子玳先等亦馬剌衛指揮僉事伯  
羊加兀者衛指揮僉事兀里著波羅阿衛指揮僉  
事阿同哥六馬忽山衛指揮僉事卜得等未朝貢  
馬及方物賜廣西州城頭目韋庇等鈔緡幣表  
裏有差

丁酉

太史英國公張輔等進扈從官軍之教



上曰朕此行豈為田獵但以國家雖安不可忘武况  
邊境之民每及秋則憂虜患若在我有倫虜何能  
為患朕為民故特因田獵閱武遂飭邊備耳又曰  
天氣漸寒雖往復多不踰月士卒渴令温飽遂命  
行在戶部每卒給一月行粮仍加<sup>麥</sup>三斗為乾餼  
命行在工部給胖襖靴鞋 交吐宣化府土官知  
府陶季容等未朝貢方物自陳其祖父世襲水尾  
縣土官水樂四年因交吐歸附授本縣知縣五年  
殺賊有功陞歸化州知州十八年陞宣化府同知  
以不從黎利叛逆陞宣化府知府黎利遣頭目黃

磊招誘季容執磊携印趨雲南臨安府蒙自縣以  
磊送總兵官給賞鞍馬諸物調率民兵導前鋒官  
軍至水尾與賊將阮五等戰斬首四級又蒙功賞  
今舊地陷沒無所于歸謹同土官主簿孔文塞土  
主吏陳孝忠頭目陶鈿未朝

上嘉念之命賜銀幣衣物如武孝先例俾居京師季  
容等又陳願居附近雲<sup>南</sup>阿迷州從之仍令有司各  
給房屋田產時加存恤毋致失所 總督香河等  
縣屯種指揮同知李三等奏今年五月以來天雨  
連旬河水逆漲塗沒此田二百六十八頃禾稼無

收命行在戶部蠲其子粒

戊戌

命行在兵部及太僕寺選民間所蓄官馬給騎卒

己亥

遣官祭歷代帝王

庚子

祭太歲風雲雷雨嶽鎮海瀆山川等神 遣官祭

旗纛之神 琉球國中山王尚巴志遣使臣鄭義

才梁回等貢馬及方物謝賜皮弁服及海舟

命行在後軍都督府都督僉事張濂任所在前軍都

督府

壬寅

命行在兵部凡扈從文武官及將軍悉准永樂中例

給脚力馬驢及其僮從悉給行糧 勅通州三河

薊州遵化軍衛有司諭以將親巡邊毋科擾軍民

以為進獻道路可通行足矣毋集民修治 勅都

督陳景先修漂河橋且諭之曰朕此行為保民也

令可渡軍馬而已既渡撤之毋多費以重困百姓

命行在戶部自通州至遵化諸驛各備一宿糧芻

命兵仗局給將士介冑兵器 湖廣客美宣撫司尚

長向大蟲及兀也吾等衛女直指揮僉事保同等  
來朝貢馬及方物 巡按直隸監察御史林文秋  
言蘇州府吳江常熟等縣松江府華亭縣久雨山  
水衝決圩岸滄後田苗命行在戶部驗數蠲租  
癸卯

命少師吏部尚書蹇義少傅兼太子少傅戶部尚書  
夏原吉少傅兵部尚書兼華蓋殿大學士楊士奇  
太子少傅工部尚書兼謹身殿大學士楊榮行在  
禮部尚書胡濙兵部侍郎王驥刑部侍郎施禮工  
部尚書吳中都察院僉都御史凌晏如太常寺卿

兼翰林院學士楊溥太常寺卿姚友直大理寺少  
卿王文貴等各率其屬扈從 勅駙馬都尉廣平  
侯袁容少師隆平侯張信行在兵部尚書張本禮  
部尚書兼華蓋殿大學士張英戶部尚書郭敷都  
察院右都御史顧佐等居守北京大小事須同計  
議措置得宜不可怠忽遇警急機務審議停當即  
行仍遣人馳奏 賞御馬監勇士一千七百三十  
五人綵段綿布 修內府海子橋 交趾土官指  
揮同知武孝先等自陳昔討黎利以敢勇應募征  
哨寧橋孝先就陣被擒守節不降仍脫走歸又領

兵於西陽古列橋等處殺敗寇象生禽偽將黎善  
等斬黎芳等首級并追殺至江賊溺死者無算晝  
夜設伏次寨堅守城柵累給奇功勘合及受銀碗  
銀牌等物今幸至京又荷恩賜襲衣銀幣然切思  
孝先父母妻子俱被黎利殺害欲乞少加陞用仍  
曷後舉

上以付行在兵部尚書張本執奏所言功狀莫稽虛  
實遂寢

甲辰

行在禮部左侍郎李嘉大寺理丞艾良為正副使

持節用東城兵馬指揮宋真女為唐王妃西城兵  
馬副指揮莊才女為新野王妃

上召扈從諸將諭曰師行須預嚴紀律申號令衣甲  
必鮮明兵器必鋒利軍容必整肅毋縱士卒擾百  
姓為將馭卒須愛之如子弟即卒事將如父兄矣  
古名將皆與下同甘苦故能得其心汝曹勉之  
行在禮部以車駕將巡邊奏定留守事宜一在  
京及在外諸司冗重遣人馳奏常事奏本送各科  
候車駕回類奏一各王府所進表箋禮部以送  
司禮監賫來之人即遣還一祭祀有司預期具奏

待報行礼一遠夷人來貢馬送御馬監方物送北  
京會同館僕車駕回類奏光祿寺供饋使臣如  
例一法司所繫輕重罪囚僕車駕回具奏一扈  
從文職官給脚力馬一匹扈從官吏人等行糧馬  
騾驢草料支給如例

乙巳

四川松潘等處軍民指揮司祈命等筭刺麻勻失  
結林澄等來朝貢馬賜朝鮮國貢使元閔生等  
宴行在都察院右都御史顧佐奏蕭牆之外置  
舖夜巡提鈴達曙已是定制令臣每於四更來朝

而長安右門諸舖提鈴已絕旗軍熟睡軍民人等  
喧雜往來不復呵問怠慢不嚴請申明約束違者  
治罪從之山東按察司奏前巡按監察御史李素至歷  
城與縣民人孫讓女姦因娶為妾御史趙純亦  
取門子鄭能妹為妾皆在按臨之地有玷風紀今  
素已陞福建按察司副使純陞河南按察僉事事  
雖經赦終不可居風憲

上曰按察司所言是命行在都察院逮治時素已卒  
惟逮純下獄夜有流星大如鷄彈色赤尾跡有  
光出北斗魁西北行至濁五鼓有流星大如盃色

赤光燭地起北河北行至北丰群

丙午

以巡邊告

太廟 申戒諸將道路所經毋擾害百姓違者處以

軍律 是日遣前鋒先發

上謂安順侯薛貴曰爾所部將士多勦動勞其已沒者官其子衰老者令其子代貴遂列奏故後軍都督府右都督馬朵兒哈失哈都督僉事把禿孫保保等一百一十二人金吾右衛等老疾指揮等官支崇子成等一百二十一人於是特以哈失哈襲

為後軍都督府右都督保保襲為後軍都督府都督僉事餘皆如例襲代 寬釋邊衛指揮千百戶罪時總兵官都督譚廣奏邊衛將士多坐小罪久繫法司缺官守備

上命法司亟錄所犯以聞於是自雜犯死罪以下指揮千百戶揚興等百餘人悉命從輕罰贖俾還職役

丁未

車駕發京師渡潞河 駐蹕虹橋召諸將諭曰朕深居九重豈不自樂但朝夕思念保民故為此行

今日渡河道路所經皆水潦之後秋天無蕪朕念  
民難閉焉於心爾將士敢有一毫侵擾民者必殺  
不赦遂命錦衣衛遣官巡察

戊申

駐蹕三河縣東之草橋三河縣官朝見

上諭之日善撫百姓今年此處水潦為災宜以實聞  
當圖優卹之母妾有科擾朝廷授汝撫字之寄民  
不失所斯汝能盡職否則有罰朕已嚴飭將士經  
過不得擾民若有擾民者汝執以聞

大明宣宗章皇帝實錄

宣德三年九月庚戌朔

車駕入薊州境內

上覽郊平原遠山川明秀田疇刈獲之後頗有遺粟  
滯穗

上甚喜歎曰使他處皆若此朕何憂焉 駐蹕薊州

西之五里橋州文武官吏耆老朝見

上進其州官諭之曰此漢漁陽郡也若張堪為政  
民有樂不可支之歌流聞至今古今人材性不相  
遠爾曹勉之又進其耆老諭曰今歲斯郡獨豐稔

無他虞善訓勵子孫務禮義庶耻之行毋安於溫飽而自棄也衆叩首而退

辛亥

車駕至石門驛喜峯口守將遣人馳奏不良哈之寇萬衆侵邊已入大寧經會州將及寬河

上覽奏曰是天遣北寇投死耳遂駐蹕石門之東

召問諸將咸請擊之亦有請益徵兵者上曰孽虜無能為也但謂吾無備故敢此來若知朕在此當驚駭走矣今須擒之不可縱也然此出峯口路狹且險單騎可行若候諸將並進慮緩事機朕以鉄

騎三千先進出其不意擒之必矣或言三千未必足用

上曰兵在精與和不在多三千精兵足辦擒賊諸軍可後進遂決策親征

壬子

駐蹕遵化縣簡精銳騎士三千人人二騎各持拾日糗糧以俟

癸丑

勅駙馬都尉西寧侯宋瑛武定侯郭珖豐城侯李賢都督冀傑曰今虜寇犯邊朕親往征之特命爾等



率領在營官軍整駐遵化須紀律嚴明晝夜詳慎  
纖毫不可怠忽諸事同議停當而行軍士有故違  
號令侵擾百姓及盜劫者悉斬以徇告人得實量  
給賞賚侯別有勅爾等移營前進

命文武扈從者悉留營中

命太子少傅楊榮從之

上率諸將及所簡騎士發遵化 駐蹕深陽驛東

甲寅

駐蹕喜峯口內 是日定遼右衛副千戶潘雄遇

虜寇力戰死雄青州益都人膂力過人熟騎射特

總兵官都督巫凱等率兵赴興河命雄為前哨至  
檀帽山遇寇奮力與戰寇圍之數重而援不至遂  
中矢死事聞卹典加厚

乙卯

車駕出喜峯口夜軍士皆嚼枚斂甲韜戈馳四十里  
昧至寬河距虜營二十里虜望我軍以為戍邊之  
兵即悉象來戰

上命分鉄騎為兩翼夾擊之

上親射其前鋒三人殪之兩翼飛矢如雨射虜虜不  
能勝繼而神機銃疊發虜人馬死者大半餘悉潰

走上以數百騎直前望見黃龍旗知

上親在也悉下馬羅拜請降皆生縛之遂獲虜生口

駝馬牛羊輜重

丙辰

斬其首渠 駐蹕寬河分命諸將搜山谷擣虜巢

<sup>穴</sup> 忠勇王金忠及其甥都督把台奏請自効

上從之有密言于

上曰虜其類也往則不復矣

上曰去留亦任所欲耳朕為天下顧獨少此二人耶

果如其志欲去雖朝夕置于左右亦終去寧能久

繫之耶曰如不欲阻其行則遣一人足矣

上曰朕以誠心待之遣即俱遣留一人乃使之蓄疑

矣朕待此二人素厚犬馬識養之恩况人乎彼

嘗有以見報遂遣之 遣將士以所獲虜寇及駝

馬牛羊輜重入關

勅駙馬都尉西寧侯宋瑛等移營前進 駐蹕冷嶺

丁巳

駐蹕會州

戊午

駐蹕會州 以重陽節賜扈從文武宴并饗將士

上既斬獲虜寇仍遣將士捕其潰散之黨至旬有  
俘獲還者

上喜大饗又親製詩歌慰勞之將士皆叩首拊舞  
夜月掩壘壁陣西第三星

己未

駐蹕會州

庚申

駐蹕會州諸將獲虜生口駝馬牛羊輜重至者自  
是無虛日

辛酉

駙馬都尉西寧侯宋瑛等以行營官軍至總兵  
官都督譚廣奏和寧王阿魯台遣使來朝貢馬已  
至宣府命中官王貴馳往宣府勞之

壬戌

車駕發會州駐蹕鉄將軍店遣中官孟繼等以  
平虜奏

皇太后及遣書在京諸王勅諭北京文武群臣諸  
將請以所獲虜寇男子十餘歲以上者悉誅之  
上曰虜誠可恨悉誅非帝王之仁凡為惡者誅其首  
足矣昨日戰陣所獲但非酋渠尚釋不誅况今巢

穴中獲至者於罪固有差等命悉解縛給食忠  
勇王金忠獲虜寇數十人馬百餘牛羊數百至  
上喜命中官賜之內厨酒饌而飲以大金爵并爵賜  
之都督把台獲虜生口及馬牛羊繼至賜亦如之  
上顧侍臣曰王者任人亦誠而已既用之即勿疑上  
疑之則下思保身免禍誰復盡心昨者如惑于人  
言豈不失此二人心侍臣言外夷之人不可任信  
太過

上曰外夷之人亦未必盡不可信但在審處得宜耳  
漢用金日磾何不可也

癸巳

上初命諸將索虜巢穴約軍至則班師至是召文武  
大臣諭曰諸將至者今十六七孟冬廟享之期不  
遠應早<sup>班</sup>班師群臣有言諸將未至者宜少候之廟  
享之期如迫請勅一親王代行禮

上曰事

祖宗與待將士孰重孔子言吾不與祭如不祭必不  
可代如有諸將更五日未至亦可俟耶即今朕留  
將士二萬于此以俟未至者必以明日班師遂命  
都督任禮太監揚慶等率官軍二萬留俟諸將畢

至則歸

甲子

詔班師詔曰恭

天撫民無華夷遠邇之間除殘去暴本帝王仁義之心故拔稂莠所以育苗而斬蛇虺為其傷物善善惡惡明聖所同朕嗣

祖宗之洪圖主萬邦之兆庶志存康濟夙夜惟勤比以殘胡嘗為邊患爰于農隙躬歷疆陲飭勵將士嚴固防守九月初二日駐師石門遽得邊報胡寇數萬南侵永突獸奔已迫近境朕躬率鉄騎三千

馳赴之將士比力協心咸奮一當百斬馘虜首萬餘級擒其酋長百餘人徑擣其巢<sup>穴</sup>盡獲其人口兵器馬匹牛羊輜重不可勝計腥羶蕩滌邊境肅清即日班師嗚呼稔惡弗戢醜虜何寔於天誅武威載揚嘉兵豈予之所志庶幾攘夷之績用副保民之心詔告中外咸使聞知

車駕發鉄將軍店 駐蹕擺山站

乙丑

駐蹕偏嶺

丙寅

車駕入喜峯關 駐蹕關內

勅守邊諸將嚴固備禦曰毋謂已安雖安不可忘危防邊之道常如寇至則寇不至晝夜頃刻不可怠忽凡寇之能為人患者率窺伺間隙乘人之不虞慎之慎之 分遣近臣巡督關隘守備 守關指揮奏近關有猛虎數出為害命都督李玉率壯士捕之

上從容與群臣往觀虎為壯士所圍方號怒上引弓一矢中之遂為壯士所擒上笑曰亦為生民除一患也

丁卯

駐蹕遵化縣東之雙城召諸將諭之曰自通州至此今歲豐歉不齊大軍所過其民皆有供給之勞朕夙夜在念今已旋師爾等宜約束軍士毋令侵擾國家畜軍以衛民不縱軍以屬民朕即遣人巡察但違令擾民者及所隸頭目皆同罪雖有功不宥又諭之曰將士不數日皆至家矣宜令守法令毋自投憲網其以朕意悉諭之命監察御史同錦衣衛官巡察官軍之擾民者以聞

戊辰

駐蹕石門驛

己巳

駐蹕薊州

庚午

駐蹕三河縣在京諸王及文武衙門各遣官進平胡表至

上覽表竟以示近臣曰稱道過矣朕于虜寇初不過嚴備之耳豈有意誅勦之而虜不悛其惡則朕安得坐視民患而不救至于誅之擒之皆天與祖宗之佑將士之用命朕何與力焉

辛未

駐蹕缸橋命諸將明日過通州二十里駐營諸將皆曰明日可至京師

上曰非謂遠不可至朕前奏

皇太后以二十四日朝見言不可爽也命扈從之臣以半先歸

壬申

駐蹕齊化門外二十里自

車駕入喜峰關至京道路軍民男女聚觀所得虜口駝馬牛羊輜重連屬數十里不絕皆喜躍叩首呼

萬歲

癸酉

車駕至京師謁告太廟

皇太后置酒上壽

甲戌

文武群臣上表賀平胡 朝鮮國王李禔遣陪臣趙璿等奉表箋貢馬及方物 賜湖廣施州衛前鎮邊忠信等宣撫司故土官舍人黃玘先等亦馬刺衛指揮僉事伯羊加兀者衛指揮僉事兀里著波羅河衛指揮僉事阿同哥亦馬忽山衛指揮僉事

卜德等鈔綵幣表裏有差

乙亥

上御左順門諭行在兵部尚書張本等曰比者畿內百姓多言今歲水澇田禾少收其孳牧馬有當陪補者皆宜寬假以候明年秋成之後 遼東建州衛女直僧綽失班等來朝貢馬 賜琉球國使臣鄭義才梁回等鈔綵幣表裏有差仍賜義才回冠帶及金織紵絲襪衣餘皆素紵絲襪衣 山東新城縣知縣董諒奏老人岳景賢等四十一人欺公玩法前縣不從所欲為其陷害今愈肆志欺凌官



府把持公事不納稅糧貽累鄉民乞懲治之  
上謂行在戶部臣曰

祖宗之世立老人正如古鄉師黨正以教小民決小  
訟必須年高有德者為之近聞此輩多不出於推  
擇悉是以賄求充妄訐上官侵害下民以私滅公  
無所不至誠如知縣所言其令布政司治之以法  
庶儆其餘 浙江於潛新昌嵒龍游四縣江西彭  
澤縣湖廣邵陽縣各奏今年春夏以來民多缺食  
已將預備倉穀及存留各年糧米給貸候秋收償  
官各具其數上 直隸金壇當塗二縣各奏今年

五月六月積雨不止河水漲溢滄沒低田禾稼令  
行在戶部覆實蠲其租稅 諸將索虜未至者自  
是次第皆至其所得虜口孳畜不可數計蓋前此  
平虜之績為最盛云

丙子

遼東梁林山等衛女直指揮僉事兀兒帖木兀者  
等衛直女指揮僉事把思塔廣西東蘭州土官知  
州韋思銘遣叔農璇湖廣施州衛前盤哨宣撫司  
故土官向墨杓聳子大旺等來朝貢馬 賜阿倫  
等衛女直指揮僉事亦省哥等鈔紵絲表裏有差

順天府灤縣奏近霖雨滄沒禾稼民困乏食官  
府責買銅錢銀珠等物艱於辦納命悉免之  
南開封之鄭州祥符陳留滎陽滎澤陽武臨潁鄆  
陵杞中牟洧川十縣湖廣沔陽州及監利縣各奏  
今年七月八月久雨江水泛濫低田悉滄沒無收  
上命行在戶部遣人覆視免秋租

丁丑

四川松潘等處軍民指揮司<sup>慶</sup>市等簇長官司故  
副長官司勤卦路市簇長官司故土官孫觀著召  
阿昔洞簇長官司故副長官司合兒者祈命簇長官

司故土官弟巴少白馬路簇長官司故土官子霍  
則勒都簇長官司故土官子川操北定簇長官司  
故土官姪那兒卜等貢馬

戊寅

以明日下元節遣鄭王瞻坡祭

長陵

獻陵

賜湖容宣撫司崗長向大蟲及尤也吾等衛  
女直指揮僉事保同四川松潘等處軍民指揮司  
祈命等旅刺麻勺失結林詮等鈔綵幣表裏有差  
行在工部尚書吳中奏今年雨多河水泛濫衝

决近郊橋道請發民脩治  
上曰及時成橋梁則民不病涉其亟為之

大明宣宗章皇帝實錄

宣德三年冬十月己卯朔享

太廟 遣中官祭司井之神

庚辰

宣諭各王府長史俾戒戢下人勿為非明日鄭王瞻  
垓等入廟又諭之曰在下小人所為王當戒之吾  
與王同氣有至愛存焉人情愛木者必去蟲愛苗  
者必去莠况吾兄弟至親之愛乎小人者其為害  
甚于蟲與莠也戒之于早可以消患於未萌不早  
戒之及其著則難制矣 行在河南道監察御史

張循理等劾奏都察院掌院事太子少保蕙左都御史劉規恃恩玩法大肆奸欺與貪淫無耻御史嚴皚等狎暱賊穢狼藉又與各部郎中主事許性汪潤等私相往來歌舞酣飲戲譟無度又每差辦事官出外先需白金五兩謂之出批銀及還復需五兩謂之銷批銀嘉興土豪馮本等坐殺人監候覆勘觀受賄縱其逃逸又縱其子輻開酒肆誘娼婦恣意淫佚盜用沒官器物及與書吏安中交通為非不止一端切詳觀職總風紀位列師臣乃不守禮法作奸犯科宜正其罰以清憲綱

上曰朕亦知之第以累朝舊臣姑隱忍之冀其能改乃不悛改益肆其志朕近日遣之巡視河道而改命顧佐者未嘗無意因命諸大臣議於是少師吏部尚書蹇義等皆言請如御史所劾遂命刑部遣人追觀

辛巳

直隸常州府進私米且言今歲雨暘調田穀茂盛

上謂尚書胡濙曰今年各處多奏水災深慮百姓艱食常州獨言豐熟願慰朕心濙對曰

陛下愛民常願豐稔聖心所欲天心從之  
上曰天果從之豈有他處水潦之患亦是為善未至  
不能格天也自今朕與卿等更當勉之

壬午

湖廣前定遠軍民府故土官知府黃路什用子永  
四川馬湖府土官知府安瘡溪長官司長官王鳳  
子輔故副長官王麟妾樊氏等各貢馬 夜有流  
星大如盃色赤尾跡有光出太微東垣東行至濁  
癸未

韓王冲焮奏平涼土薄天寒到國以來祿米不充  
於用軍校以道遠多逃亡聞長沙府治久聞遷國  
於彼實感恩賜

上復書王曰歲祿不充蓋陝右頻歲無獲未免供給  
不及若年穀稍豐便可足用惟叔安意以俟之府  
中軍校未至者已勅兵部挨究遣來長沙之諭

先帝成命在上不敢渝越惟叔亮之 遼東沒淪河  
等衛指揮僉事卜顏不哈等來朝貢方物

上諭行在兵部尚書張本曰緣邊關口皆外連寇境  
今天氣已寒須嚴謹邊防爾宜移文戒飭將士令  
用心無怠仍命御史給事中往來巡視有懈怠者

罪之 賜扈從巡邊文武官員人等筵宴錢官每  
員鈔伍錠金人將軍校尉軍士人二錠辦事吏尉  
役厨人軍伴之屬人一錠

甲申

遼東玄城等衛指揮僉事乃塔哈兀者前等衛女  
直指揮僉事安同等及西番僧納立巴等來朝貢  
方物

命賜武侯薛祿克總兵官遂安伯陳英為左叅將武  
進伯朱冕為右叅將率領官軍鎮守薊州永平山  
海等處操練軍馬并提督各關隘口謹慎隄備遇

有賊寇相機剿捕所領官軍悉聽節制又勅祿等  
曰尔等出塞殺虜備歷辛勤固當休息但虜殘寇  
懷忿復來侵擾今且留尔等鎮守薊州遵化以備  
之須晝夜用心哨瞭各城堡關隘必嚴固防守不  
可怠忽

命都督僉事陳景先復守薊州永平等處 賜朝鮮  
國使臣趙璿等鈔幣有差 榮河郡主薨主韓憲  
王之女嫁儀賓王榮訃聞命有司治喪葬遣中官  
賜祭

乙酉

上謂群臣曰古者師保之職論道經邦寅亮燮理不  
煩以有司之政今少師蹇義少傅楊士奇少保夏  
原吉太子太傅楊榮皆

先帝簡畀以遺朕者而年俱高令兼有司之務非所  
以禮之于是賜勅諭義士奇原吉榮曰卿等祇事  
祖宗多歷年所忠謀讜諫積劾勤誠朕嗣統以來尤  
資贊輔夙夜在念圖善始終蓋以卿春秋高尚典  
繁劇優老待賢禮非攸當况師保之重寅亮為朕  
不煩庶政乃副倚毗可輟所務朝夕在朕左右相  
與討論至理共寧邦家朕名俸祿悉如舊舊卿其專

精神審思慮益致嘉猷用稱朕眷注老成之意欽  
哉 陝西故都指揮僉事蘇宇羅弟貴烏思藏麻  
高僧谷哩麻星吉等來朝貢馬 賜朝鮮國世子  
六梁冠一先是朝鮮國王李禔奏蒙洪武中賜國  
王冕服九章陪臣冠服比朝廷遜降二等蓋陪臣  
一等比朝臣第三等得五梁冠服永樂初先臣芳  
遠遣世子禮入廟蒙賜五梁冠服臣切惟世子冠  
服乃同陪臣一等乞為定制

上從之故有是命 賜遼東朵林山衛女直指揮僉  
事兀兒帖木兀者衛女直指揮僉事把思塔及建

州衛女直僧綽失班等鈔綵幣表裏靴襪有差  
夜有流星大如盃色赤尾跡有光出昂西行至濁  
丙戌

上命駙馬都尉趙輝豐城侯李賢分往河南京太僕寺  
印烙馬騾給民牧養凡二萬九千五百七十二匹  
薊州永平等處守備都督僉事陳景先言自山海  
至薊州一千六百餘里關塞一百一十三處守備  
軍少今天寒冰凍無復泥濘可為限制恐虜寇乘  
間竊入請以緣邊山海永平等一十六衛所見在  
神机營操練馬步官軍就帶原關衣甲暫留操備

從之 夜有流星大如盃色青白光燭地起紫微  
垣內北東行至濁

丁亥

迺北和寧王阿魯台遣使臣那塔失等四百四十  
五人來朝貢馬四百六十四匹 賜四川麥市峪市  
牟力劫阿昔洞等族長官司司長官舍人勒卦若兒  
節規著召合兒者等及祈命白馬路勒都北定哥  
簇土官舍人巴少霍則川操那兒卜等湖廣前盤  
順宣抚司故土官舍人向大旺廣西東蘭州土官  
知州常思銘叔農璇等鈔綵幣表裏紵絲襲衣靴



襪有差

戊子

命行在工部造

東宮儀仗 烏思藏番僧刺麻巴節等來朝貢馬及  
方物 夜有流星大如盃色赤有尾光燭地出天  
津後有二小星隨之西北行至濁曉刻熒惑犯太  
微西垣上將

己丑

陝西行都司土官都指揮僉事魯失加遣頭目祿  
祿進馬且奏即尔加簇刺麻鎖南黑巴頭目綽束

卜兒加等二百三十七帳男婦一千一百六十五  
人舊逃往苦薛等處今皆招撫復業

詔蜀江西德興鉛山銅場夫徭先是二縣銅場歲浸  
銅得五千餘斤所用鐵炭丁夫自備其諸差徭料  
徵皆不免歲額累虧至是勅有司悉免其雜役稅  
糧於附近輸納仍令廣信饒州等府辦給鐵炭所  
需鐵炭之家免雜役之半稅糧則運輸南京淮安  
昏刻月犯外屏西第三星月在南

庚寅

翰林儒臣進講春秋竟

上曰聖人匡世之功憂世之心備見此書當時先王  
禮樂法度日隳廢孔子接迹而起有此書而  
後天下皆知尊周又曰孔子作此書以尊周為本  
孟子乃以王天下勸齊梁之君何也侍臣對曰孔  
子之時周室雖微天下猶知尊周孟子之時七國  
爭雄天下不復知有周矣

上曰聖賢之心無非為天下生民之計孟子時不有  
王者興何以解生民塗炭遂賜講臣坐命左右賜  
果茗

辛卯

遣行在吏部右侍郎王讓兵部右侍郎曹本都察  
院左僉都御史李璿大理寺左寺丞楊復鴻臚寺  
寺丞焦循分督直隸浙江江西秋租勅讓等曰卿  
等須視國事如家事潔已愛民勤慎不怠庶幾不  
負任使

上以琉球國中山王尚巴志朝貢謹遣使齎勅往  
勞之并賜王紵絲紗羅段錦

壬辰

行在都察院奏軍官犯罪繫獄有病者請醫治療  
上因謂右都御史顧佐等曰

祖宗待軍官恩意特厚雖已得罪猶思保全此成憲  
當百世守之 夜月犯昴

癸巳

命行在吏部增設江西饒州府德興縣廣信府鉛山  
縣丞各一員專管銅課仍勅江西布政司量設銅  
夫免其雜差使專力浸辦其遞年所欠銅課悉與  
蠲免 曉刻月生五色雲鮮明

甲午

賜和寧阿魯台等處貢使宴

乙未

巡撫蘇松等處大理寺卿胡槩奏各部累差郎中  
主事等官催督蘇松及浙江諸郡造紙買銅鉄等  
物今年蘇松及紹興等府水滂民飢乞停買諸物  
所差官員悉取回京

上命六部除軍需所用外餘悉停止所差官各令還  
京

丙申

雲南富州故土官知州沈絃經子政遣把事周懿  
烏思藏等處高僧孛兒只藏卜來朝貢馬

丁酉

勅總兵官陽武侯薛祿及遼東總兵官都督僉事巫  
凱謹邊備 行在吏部侍郎郭璉等引奏即中張  
寶黃安及叅議蕭常府縣等官考滿稱職者五十  
人平常者八人俱未九年例應復戍  
上諭寶等曰國家黜陟之典所以要成功尔等其志  
加勉以付任使

戊戌

迤北和寧王阿魯台遣使臣多赤等貢馬且歸清  
平伯吳成家屬初成等守興和日事田獵而忽守  
備虜伺其出乘虛入城掠其妻孛以去至是因朝

貢之使并遣來歸 賜湖廣前定遠軍民府故土  
官舍人黃永四川馬湖府土官知府安璿沅溪長  
官司舍人王輔故副長官王麟妾樊氏等鈔有差

大雪

上喜謂侍臣曰今年四方多言水旱生民艱食朕恒  
為憂惟冀

天地垂佑兩暘及時庶豐稔可望今冬初即見雪其  
來歲有秋之兆乎然欲昭格

天心朕當日加兢惕因賦雪詩以示不忘詩曰上冬  
暢月月維霜禾稼既納農滌場順時布令循典常

敷命有司謹蓋藏肆備邊圉寧封疆祈年天宗致  
予誠日維戊戌墜五冥豐隆獎二相激揚太陰冥  
冥闔室青六出皎皎未禎祥霏素糝潔皆華英大  
地一色凝白朐瓊樓玉宇歛相望八表六合含輝  
光下民遠迓忻洋洋吹笙考鼓歌樂康來茲慶兆  
宜農穰相呼相勸趁耕桑嗟予匪德承寧蒼萬<sub>機</sub>  
競業寧敢忘聞困志喜形詩章

巳亥

四川龍州土官知州薛忠義遣把事楊進原等貢  
馬賜遼東沒倫河玄城等衛指揮僉事卜顏不

哈乃塔哈兀者前等衛女直指揮僉事安同等陝  
西故都指揮僉事蘇孛羅弟貴烏思藏刺麻答哩  
麻星吉巴節等及西番僧納立巴等鈔絲幣表裏  
紵絲氎衣靴襪有差太子少保兼左都御史劉  
觀至命左右以監察御史彈章示之觀自陳歷事

太祖皇帝

太宗皇帝

仁宗皇帝累官至左都御史加太子少保<sub>太</sub>俸並支  
皇上嗣登寶位常加賜賚臣日夜孜孜思圖補報今  
右都御史顧佐搜求臣罪主令各道御史糾劾又

通書吏安中妄指臣受<sup>賦</sup>等罪伏望

聖上憐憫察情明辨庶無冤枉

上曰臣下密奏觀罪者非一人朕以其舊臣未忍罪之今尚款文過即遂出臣下密奏示觀蓋言其前後鬻獄受白金者千餘兩觀不能隱皆引伏法司議觀所犯皆枉法於律應斬

上命下錦衣衛獄 夜有流星大如盃色青白光燭地起騰蛇西行至濁

庚子

命因官郭敬同武安侯鄭亨鎮守大同 日生左

右珥色黃赤鮮明

癸卯

琉球國中山王尚巴志遣使臣南者結制等來朝貢馬及方物 監察御史何善坐巡按廣東勞役軍民為僧建寺又乘驛枉道還家罷為民

甲辰

上諭行在工部臣曰今年天氣已寒諸衛軍士用工七月之上未得代者皆罷遣還

乙巳

烏思藏及刺卜等簇番僧札宗等來朝貢馬巡按

山西監察御史沈福言澤州沁水蒲靈右等處八月早霜禾稼不實民食艱難皆採拾自給

上命行在戶部議賑卹之

丙午

勅總兵官陽武侯薛祿及都督陳景先曰得永平府奏胡寇至盧龍陳家莊劫掠人口馬牛爾等宜嚴飭官軍晝夜瞭望謹慎隄備若寇再至須盡殄乃已失機悞事必殺無赦迺北韃靼阿魯不的來朝貢馬奏願居京自効命為所鎮撫賜冠帶金織襲衣綵幣銀鈔綿布鞍馬仍命有司給房屋器皿

如例行在廣西道監察御史胡啓先坐受賄荐舉不當罷為民行在陝西道監察御史趙倫巡按湖廣需索官民羅綺等物及收買人口又與樂婦姦事覺

上命譴戍遼東

丁未

命都指揮同知蔣貴率領官軍及神銃手守密雲

大明宣宗章皇帝實錄

宣德三年十一月己酉朔行在欽天監進宣德四年大統曆

上御正朝受之給賜諸王文武群臣頒行天下朝  
鮮王李禔遣陪臣李恪等奏箋及方物賀  
皇太子千秋節

庚戌

授皇妹慶都公主冊命彭城衛指揮焦毅弟敬為  
駙馬都尉賜之誥命

辛亥



賜逸北和寧王阿魯台使臣那塔失等四百四十五人鈔二萬六千三百錠絲幣一千三百三十五表裏絹六十三疋 中書舍人陸伯倫言蘇州府常熟縣七浦塘與揚城湖連接東西相距百里漑溉常熟崑山二縣田計納稅糧二十餘萬石七浦塘因潮往來河港淤塞水不通流致連年田稼枯瘁無收乞令受利人戶出力開濬從之 陝西按察司副使胡永成奏岷洮二衛官軍俸糧俱是西安等府人民送納山路險遠常年惟賣布絹等物至鞏昌諸處易米上倉七賴之人私通官吏虛買

實收其官吏人等習以為常輒遣家人出境邀接通同作弊又或販賣私茶或在途盜劫深為民害緣鞏昌至岷洮不下五百餘里山林深僻俱無守禁官司乞於中途三岔口設巡檢司巡捕盤詰軍民俱便

上命行在戶部兵部即如所言行之 湖廣武岡州江西星子縣各奏去歲水滂不收今年春夏民皆缺食已發預備倉賑之悉具數聞 廣西思明府土官知府黃炯奏憑祥縣歲凶民飢命發龍州官倉賑米賑之

壬子

勅總兵官都督僉事巫凱及掌遼都司事都督僉事

王真等整飭遼東屬衛軍馬提督各城池屯堡站

赤閑溫謹慎從備嚴加哨瞭遇有寇至相機剿捕

四川平夷長官司通事文友得廣西上思州土官

知州黃智永遣頭目黃安等陝西階州何日等簇

刺麻納麻聖哲等來朝貢馬賜烏思藏等處高

朶兒只截下等四百五十六人絲幣表裏有差

癸丑

以明日冬至遣鄒王瞻峻祭

長陵

獻陵

甲寅

冬至節上御正朝受朝賀大宴文武群臣及四夷

朝使

皇太后

皇后免文武群臣命婦朝

乙卯

烏思藏花言城等簇刺麻簇頭南哈亦什土官百

戶札巴星吉馬巴簇番僧宗竹劉等來朝貢馬

丙辰

陝西岷州衛刺荅等簇生番頭目官着哨等洮州  
衛哈倫簇土官百戶結祿等來朝貢馬 賜雲南  
富州把事周懿等鈔

丁巳

新行在都察院右都御史顧佐曰都察院之任所以  
整肅紀綱糾察奸弊伸理冤枉裨益治道比命爾  
居是任所當夙夜盡心以副簡擢然各道御史尚  
溺積習之弊朋比於下有挾公法以報私忿深文  
刻薄有重私情而忽公法肆無忌憚爾一時不察

其奸為所欺侮今自宜詳慎省察凡事務致明審  
以合公道毋縱有罪毋枉非辜庶幾刑罰公平不  
負朕之所望欽哉又勅十四道監察御史曰御史  
之職必先正己心而後用法不頗比憲綱不清皆  
由所用邪正混淆朕簡用顧佐為都御史各道御  
史不才者多已黜罰然其間積習之弊猶未盡革  
或溺私情而賣公法或假公法以報私忿鞫訊之  
除任情燬煉深文羅織人寧不寃自今悉宜秉公  
心行公道無欺長官無徇私意無枉平民庶副朝  
廷任使如或不遵必罪不恕欽哉 陝西北州衛

朶咂族番僧剏巴星吉等來朝貢馬

戊午

湖廣鎮南長官司副長官譚汝銘遣把事鹽蠟貢馬  
迤北韃靼罕平來歸奏願居京自劾命為總  
旗賜紵絲氍衣鈔布仍命有司給房屋器皿如例  
賜迤北和寧王阿魯台使臣多赤等四川龍州  
把事楊進原等鈔絲幣表裏靴襪有差

己未

皇太子千秋節免百官賀禮 夜有流星大如雞彈  
色赤尾跡有光出軒轅西北行至雲中

庚申

上命行在禮部凡王府官進東宮箋者賜鈔二百錠  
天下諸司進者賜六十錠 湖廣前廣平安撫司  
故土官安撫向顯祖孫大彪陝西岷州衛班威等  
簇刺麻烟丹朶等來朝貢馬 平江伯陳瑄奏運  
過米數

上諭行在工部尚書吳中等曰此皆勞民所致卿等  
無以為易已運至者必如法苦蓋勿令損壞今天  
寒冰凍亟須散遣軍夫工程有未畢者亦俟春暖  
又諭中曰今已遲矣即遣人馳驛諭之 總兵官

都督蕭授奏貴州都司都指揮僉事李政等招捕  
都勻衛豐寧長官司賊首羅文蕩貴州宣慰司谷  
把塞苗人車子裸等俱向化復業惟羅文蕩稔惡  
日久今械送京師請正其罪以儆其餘  
辛酉

賜琉球國使臣南者結刺等鈔絲幣表裏有差  
浙江杭州府奏臨安新城二縣今年秋冬人民缺  
食已將預備倉糧一千三百九十六石有奇驗口  
給賑

壬戌

巡按山東監察御史包德懷奏遼東廣宣後屯衛  
西長嶺蕤賊入寇剽掠傷人倫禦都指揮李敏及  
提督瞭望千百戶皆約束不嚴請罪之

上諭行在都察院臣曰軍官備邊但守常法以保境  
安民如能謹嚴豈有外患古之良將維安閑之際  
常若臨敵不敢少怠今失機皆由主將號令不嚴  
軍政不脩所致其令御史治之如律

甲子

賜烏思戩及刺卜等簇番僧扎宗等鈔絲幣表裏  
有差

乙丑

遼東自在州驍官千戶舍人李開原保逸北和寧  
王阿魯台部下都督同知失程千子孛羅帖木遣  
使臣把兒台等來朝貢馬 行在都察院右都御  
史顧佐奏近江西鄱陽縣民董復安建言鈔法阻  
滯請禁使銀不拘舊例凡交易銀一錢者買者賣  
者皆罰鈔一千貫一兩者罰鈔一萬貫仍各追免  
罪鈔一萬貫又言官吏人等貪贓者原其害民之  
情非止一日偶因一事而發耳若止追一事之贓  
則彼為得計今官吏貪贓者若受鈔則仍追鈔受

貨物者估其值倍十倍罰鈔受銀者每兩罰鈔一  
萬貫仍追免罪鈔一萬貫庶可禁止奸貪民間鈔  
漸少必通行不滯矣戶部議從其言臣竊見交易  
銀兩已有榜例今欲追鈔并官吏受贓者亦計物  
估價追鈔可從其議其追犯人免罪鈔一萬貫緣  
犯有輕重罪有不同難一槩追罰宜免追從之  
曉刻太白犯罰星

丙寅

遼東東寧衛女直指揮僉事審因塔等來朝貢馬  
及方物 日生左珥色黃赤鮮明昏刻歲星犯壘

璧陣西第六星

丁卯

賜和寧王河魯台使臣宴 監察御史張循理有罪下獄死先是河南道監察御史趙儼往河南清理軍伍非法杖死無罪九人事發罪應死監候處決循理與儼故同僚一日共酒召儼出獄共飲飲罷儼乘間逃逸行在都察院官奏循理縱死因上命行在錦衣衛鞠之至是以病死獄中

戊辰

陝西岷州衛好地平等簇番僧容中等貢馬

命御史巡察皇城四門時四門官軍玩法怠弛官吏工匠無閑坊牌者恣其出入不問而民間有進納內府財物者故生事留難必得賄賂乃得入事聞

上諭都御史顧佐曰守門官軍違法害民如此其揭榜曉示若不革前弊悉處重刑常以御史一員往來四門巡察著為令 行在兵部尚書張本言茶陵衛指揮僉事陳倘鄭果鎮撫王昇千戶白真朱斌百戶李剛等知本衛指揮王貴同谷庶人謀逆容隱不首律應斬

太宗皇帝特宥其死謫戍交趾立功後遇赦擅復職  
亦有已死令子弟襲者名肥知情謀逆維經赦不應  
復職請罪之

上曰前罪已赦後罪但擅復職姑宥之謫戍遼東至  
功一有流星大如碗色赤有光出天苑東南行  
至濁

己巳

命太師英國公張輔等撥軍備沿南海子周垣橋道  
庚午

命鎮守甘肅總兵官都督僉事劉廣及陝西行都司

於屬衛揀選精銳官軍一千人各備馬及軍器聽  
太監王安率領期宣德四年二月十五日以前至  
京迤北和寧王阿魯台使臣多赤等陞辭

上以阿魯台據誠歸化遣曹者赤帖木兒等與多赤  
偕行賞勅撫諭仍賜錦綺器物視昔加厚曹者帖  
木兒初為錦衣衛帶俸指揮僉事至是陞指揮同  
知以行

辛未

上御左順門謂行在禮部尚書胡濙曰昨日廣宗縣  
奏訓導生員囑公事通賄賂朕已令法司逮問朝



廷建學養士望其成才以資任用訓導居師表之  
任正當謹守禮法以率諸生使人皆如此賢才何  
由得成卿等宜申明舊章嚴加戒飭以副朝廷教  
養之意

上退朝御文華殿召待臣問曰國家恒欲人才足用  
官使得人而才每不足官或曠職何也待臣對曰  
人才出自學校學校興不患無人才人才衆多則  
官得人矣

上曰今國家郡邑有學以育秀民京師有學以升其  
成才者而復命之歷事諸司考其才器之高下而

用之立法可謂備矣然

祖宗時咸稱得人聞比年生徒多不務學徒記陳言  
為出身之資及授以職訖無實用是蓋師範不得  
人也唐陽城為國子師斥諸生之久不省親者於  
是人知孝宋胡瑗教授蘇湖置經義治事齋當時  
成就者多此正古人所謂師嚴而道尊道尊而官  
正待臣對曰誠如

聖諭

壬申

命故金吾右衛指揮同知劉煥弟全金吾後衛指揮

同知王輔子貴職以府<sup>軍</sup>後衛指揮僉事呂凱羽  
林前衛指揮僉事柳聚老疾命凱子斌聚子瑀代  
賜朝鮮國使臣李恪等鈔絲幣表裏有差 山  
東都司都指揮使吳壯都指揮同知張鐸陝西都  
司都指揮孫霖大寧都司都指揮僉事潘禮各以  
老疾致仕 行在禮部奏都指揮郝慶等亡後例  
應賜祭從之

癸酉

命按察使邵玘為南京都察院左副都御史鄭辰為  
南京工部右侍郎叅政段民署南京戶部右侍郎

李衡署南京兵部左侍郎按察司副使成均署南  
京刑部右侍郎僉事柴震為南京大理寺丞按察  
司副使魏源署行在刑部右侍郎僉事傅啟讓為  
行在大理寺少卿先是

上以兩京六部都察院堂上官多缺命廷臣察舉方  
面官之廉公才幹者得玘等及江西叅議劉中敷  
九人遣人召之中敷以運糧最先至會山東奏方  
面缺官遂陞山東叅政玘等八人相繼皆至

上命行在吏部曰官宜慎簡不可輕授明試以功此  
唐虞法若品秩相等即實授不然且令試職觀其

才猷設施然後授之於是北辰震啟讓皆實授餘  
皆署事時啟讓先以食正四品祿 賜廣西上思  
州頭目王安四川平夷長官司通事文友得等鈔  
有差 行在錦衣衛帶俸指揮鍾法保奏臣廣州  
東莞縣大步海人知傍海橫沙潭石等處皆有珠  
池產大珠請差內官同往採

上諭錦衣衛指揮王節曰此小人欲生事擾民以圖  
已利即收繫於獄

甲戌

上御奉天門諭行在工部尚書吳中等曰夜來風氣

已寒因念邊軍尤苦允閑口煙墩守瞭者即各與  
毛襖狐帽其舊給已敝者悉以新者易之 賜借  
州河目等簇刺麻納麻聖各等鈔絲幣表裏有差  
乙亥

陝西階州利簇刺麻番僧阿竹等來朝貢馬 監  
察御史楊昂朱惠俱九年考滿行在吏部言昂練  
達政務惠政績未著

上曰考績黜陟所以示勸懲興事功果得其宜則能  
者益勸中才亦將自勉昂仍于風憲陞用惠循常  
例而已於是以前昂為浙江按察司僉事惠為太僕

寺丞陞貴州思州府通判檀凱為應天府治中點  
四川道監察御史曾令得為浙江温州府推官江  
西道監察御史陳巖為江西贛州府推官皆以都  
御史言其不任職也 賜陝西岷州衛刺谷等簇  
生番頭目官看肖兆州衛哈倫桑哩等簇土官百  
戶結祿番僧剗巴星吉烏思截花言戒等簇刺麻  
簇頭哈亦什土官百戶扎巴星吉馬巴簇番僧宗  
竹剗等二百二十一人鈔絲幣金織紵絲羅衣靴  
襪有差

丙子

陝西西寧衛章哩簇土官指揮僉事切帖兒加鞏  
昌府僧綱司禪師鎮南巴遣刺麻工烏堅贊岷州  
衛刁剗等簇番僧頭目南哈谷中等來朝貢馬  
賜湖廣鎮南長官司把事驢蠟前廣平安撫司故  
土官舍人向大魁等鈔有差 行在吏部左侍郎  
郭璉奏巡按御史考覈在外郡縣官之才職平常  
者皆送至部宜有黜罰以示激勸  
上謂璉曰平常者才不及耳如無贖罪但降用之其  
郡佐及縣正佐降雜職若未入流則改除遠遠不  
足罰也又謂璉曰凡考覈來者爾亦須審察其中

或有堪用當量高下授職無棄在之

丁丑

擢廬陵縣知縣孔文英黃州府儒學教授趙奎霍  
州學正張景德清縣學教諭尹鏜蒙陰縣學教諭  
余濯山陰縣學教諭袁海蒲忻縣學教諭朱鑑萬  
載縣學教諭董匡新樂縣學訓導李慈富順縣學  
訓導楊禧南陽縣學訓導王質遂安縣學訓導張  
政新建縣學訓導方瑞臨安府學訓導白圭鄭州  
學訓導番岳江都縣學訓導張鼎進士揭稽謝衡  
施信胡器鄧榮高舉熊翼張琦章聰王讓丘俊監

生強敏梁軫趙敏郭原陳懋程富張鏞李志唐琛  
皆為監察御史文英鑑行在浙江道奎李懋行在  
河南通舉翼琛行在福建道果衡信陳懋行在江  
西道昂榮行在廣東道聰謙鏞行在廣西道禧俊  
原行在四川道鏜富行在陝西道海質岳行在雲  
南道政稽行在湖廣道濯琦行在交趾道瑞圭志  
行在山東道強敏軫趙敏行在山西道匡器行在  
貴州道先是右都御史顧佐奏舉進士監生及聽  
選知縣教官凡四十三人才堪御史  
上令於各道廋改三月考其能否第為上中下三等

以聞至是佐考校上等知縣孔文英等十二人中  
等教諭楊禧等二十四人下等董教等七人

上命上等中等俱為監察御史下等再歷三月考其  
賢否其以名聞因<sup>謂</sup>為佐曰人才高下不齊使練習  
之久加以考察彼將自奮而皆可用矣 賜朝鮮

國使臣李怡等宴 賜陝西班藏等簇刺麻煙丹

靴等鈔絲帶表裏紵絲氍毹靴襪有差 藍田縣

主卒王保安懷禧王之女嫁孫賓徐榮<sup>計</sup>聞遣中

官賜祭命有司治葬事 中軍都督府都督同知

陳翼卒翼湖州長興人初敵父職為統騎前衛百

戶以功陞濟陽衛千戶累陞至中軍都督府都督

同知至是卒遣中官賜祭賜賻贈給舟歸其喪葬

長興 夜有流星大如雞穉色黃赤有光起輿鬼

東北行至暮氣

大明宣宗章皇帝實錄

宣德三年十二月戊寅朔

上省郊祀牲

己卯

日生暈色黃赤鮮明

庚辰

脩盧溝橋凌水所決河口

辛巳

采顏衛鎮撫晚歡陝西岷州衛頭下等族番僧領  
占星吉河州衛故土官千戶宗思<sup>父</sup>子敬等來朝

貢馬行在工部言通州要見渡河決水從東注  
而正河淺溢舟行不便請發民備築從之

壬午

賜建州衛舍人阿里因納遼東自在州官舍人李  
開原保東寧衛女直指揮僉事賽因塔等鈔絲帶  
絹布紵絲氈衣氈襪有差 總兵官平江伯陳瑄  
奏今年應賞運糧官軍鈔未給請俟明年春運糧  
至京給之

上謂行在戶部尚書郭敦曰一年勤苦賞以酬勞豈  
可候明年敦言山東淮安德州等處官庫所收鈔

多請遣官會同平江伯如例支給從之

癸未

撤馬兒罕回回打刺罕亦速等來朝貢馬 賜陝  
西岷州衛好地平等簇番僧容中秦州衛階州利  
簇刺麻番僧阿竹等紗絲帶表裏有差 甘肅總  
兵官都督僉事劉廣奏永昌衛指揮梅英莊浪衛  
指揮方柔提調守備不嚴

上命姑記罪令專巡捕番寇如再失機必罪之

甲申

山西平陽府奏霍絳吉隰臨汾翼城永和汾西蒲



浮山鄉寧大寧石樓襄陵太平禹泉稷山河津岳陽安邑倚氏絳垣曲趙城臨晉二十五州縣春夏不雨種不及時至八月中嚴霜菽豆皆死田無收獲百姓饑困

上謂尚書郭敦曰宜速遣人賑濟凡各處災傷之處皆寬徭緩賦以蘇息之 駙馬都尉廣平侯袁容卒容直隸鳳陽人父洪從

太祖征伐有功官至都督洪武中容以選為燕府永安郡主儀賓

太宗清內難容侍

仁宗守北京

太宗既正大統進永安為公主容亦進駙馬又以守城功封廣平侯食祿一千五百石凡

車駕出外皆命容守北京容通敏有才智蒞事周密而謙和接物至是卒追封沂國公謚忠穆遣官賜祭命有司治喪塋子禎嚴謙和如父而孝友廉慎過之

乙酉

臘節賜文武群臣宴 賜和寧王所部都督失捏千子字羅帖木所遣使臣把兒台等鈔絲幣表裏

金織紵絲絨衣等物仍命祀兒台齋勅及絲帶表  
裏賜字羅帖木

戊子

廣西田州府故土官知府岑祥子紹遣頭目黃聰  
湖廣散毛等宣撫司故土官黃楚子敬瑄等來朝  
貢馬及方物

己丑

曲先等都指揮同知散即思安定王亦攀丹都指  
揮僉事桑哥等遣鎮撫失列門等陝西西寧衛即  
爾加簇刺麻頭目鎖南黑巴綽東卜兒加遣頭目

祿祿等來朝貢馬

庚寅

廣西思恩州土官知州岑英遣弟璣湖廣施南宣  
撫司同知單敏遣把事黃玘等來朝貢馬前石南  
道萬戶府故土官知府單原子惠貢馬奏乞絨織  
遣內官柴山等齎勅使琉球國賜其王金織紵  
絲絨羅絨錦 四川掌都司事都督同知李敏奏  
叙州府高瑛為連縣設三分巡檢司高縣設江口巡  
刻掠請於為連縣設三分巡檢司各置弓兵八十人以四  
檢司瑛縣設洞門巡檢司各置弓兵八十人以四

川三司所問因徒充又瑛縣東堡宜令叙南衛添  
撥軍士七十名與原撥三十名相兼守備為宜從  
之

癸巳

上以胡虜皆遣人朝貢緣邊重地皆有戍兵而總兵  
官陽武侯薛祿等尚暴師於外宜令休息遂召祿  
等還令都督陳景先率備禦官軍嚴戍守 遼東  
總兵官都督僉事王凱奏昨遣余吾右衛指揮使  
劉瑞迤北巡哨瑞畏難逃回廣寧不行請罪之  
上謂行在兵部尚書張本等曰軍官巡邊自是常職

今食三品祿不思效勞猶脫身退避何以令眾其  
令凱治之如律 陝西按察司副使胡永成奏岷  
州衛指揮千百戶龐教等盜賣鳳翔等府秋糧六  
千一百餘石虛出實收悉應提問

上曰朕慮邊餉不足常切留心今<sup>奸</sup>弊如此軍士何  
所仰給古云軍灶未炊將不言饑今但務肥己不  
恤士饑此豈可用命悉治之如法

甲午

定儀賓班次先是寧王權言慶賀行禮拜進表箋  
三司官員皆依品秩序列獨儀賓未有定制

上命行在禮部考定其儀至是尚書胡濙奏臣按共  
武禮制郡王儀賓秩從二品縣主儀賓秩從三品  
郡君儀賓從四品縣君儀賓從五品鄉君儀賓從  
六品若遇行禮宜序於同等官員之左

上曰禮不踰等儀賓雖親當守定分此為定制其頒  
行遵守 朝鮮國王李禔遣陪臣柳殷之等來朝  
貢方物賀明年正旦土魯番成都督瑣恪弟猛哥  
帖木兒來朝貢馬命為指揮僉事 行在山西道  
監察御史張敬親喪服闋改行在山東道  
乙未

陝西岷州衛刺麻扎卦速南烏思藏刺麻落丹等  
來朝貢馬 賜陝西岷州衛刀劊等簇番僧頭目  
南哈谷中領占星吉等河州衛故土官千戶宗思  
義子敬朶顏衛鎮撫脫歡西寧衛章哩簇土官指  
揮僉事切帖兒加鞏昌府僧綱司刺麻工葛堅贊  
等鈔絲帶表裏有差 行在兵部奏北京行都督  
府都督同知徐甫掌四川都司都督僉事山雲總  
兵鎮守廣西今行府已革宜改注他府  
上命註於右軍都督府 增設武功左衛中左中右  
中中中前中後五千戶所時武功左衛言績收逃

臣編軍一萬五百餘名軍多事劇請如武功中衛  
例增設伍所命行在禮部給印兵部除官兵部奏  
於羽林等衛選官改授從之 行在刑部都察院  
奏決重囚

上命公侯及都督尚書都御史同審覆諭之曰古者  
斷獄必訊于三公九卿所以合至公重民命卿等  
往同審覆毋致枉死太師英國公張輔等覆審還  
奏訴枉者五十六人

上命法司重與勘實又一曰殺不辜者縱免人責難  
逃鬼誅不可不慎 雲南布政司承差洪溢奏車

里宣慰使刀美因與簇叔靖安宣慰刀雙孟相仇  
殺棄地投順老過請差官同往招撫

上謂尚書胡濙張本等曰蠻夷仇殺常事豈可輒聽  
小人之言其令黔國公與三法司計議處置之

丙申

命改山東都司都指揮僉事湯銘子勝為通州衛指  
揮使金吾右衛帶俸都指揮僉事郭得原子永蘇  
為本衛指揮僉事金吾前衛指揮使朱嵩叔能羽  
林前衛指揮同知李俊弟忠府軍右衛指揮同知  
鄭瑜子文錦衣衛指揮僉事馬貴子廣金吾右衛

指揮僉事秦敬姪斌俱該原職 脩南京各衛倉  
命襄城伯李隆以各衛軍及餘丁應天等府以丁  
多人匠為之 巡撫浙江大理寺卿胡榮等械強  
賊平康之黨三百人至京康海鹽縣人初名史慶  
真有罪充軍而逃改名平康居崇德縣交結豪橫  
多畜僮奴強奪民田劫掠財貨以是家富造居室  
器用僭擬王公鄉人忤其意者輒殺之其怨家訴  
與巡按監察御史尹崇高遣人捕之康挈家逃會  
赦還糾集流民并千戶范信等凡八百餘人奪民  
舡五十餘艘備弓矢銃砲鉦鼓嚴號今夜劫怨家

執其親屬鄉里盡掠其家財燒其廬舍驅逐其子  
女以去遂大肆劫掠旁近民皆驚走郡縣莫能制  
稟奏請捕之

上命錦衣衛遣官與榮督巡按御史浙江三司捕之  
康復逃至是獲黨至上諭三法司官曰平康罪不  
可宥但一人之惡而累衆如此其中豈無良善註  
誤者卿等宜與之辨無罪者不可濫刑有罪者不  
可倖免必須得實仍令御史三司捕平康

丁酉

勅行在錦衣衛指揮任啟叅政葉春監察御史賴

瑛同太監劉寧往鎮江常州及蘇松嘉湖等府巡  
視軍民利病殄除兇惡以安良善凡軍衛有司官  
吏旗軍里老并土豪大戶積年逃軍逃囚逃吏及  
在官久後吏卒倚恃豪強挾制官府侵欺錢糧包  
攬官物剝削小民或藏匿逃亡殺傷人命或強占  
田產人口或<sup>汗</sup>辱人妻妾子女起滅詞訟誣陷良  
善或糾集亡賴在鄉劫奪為軍民之害者爾等即  
同大理卿胡榮體審的實應合擒拿者不問軍民  
官吏即皆擒捕連家屬撥官軍防護解京有不服  
者就本都司及所在衛所量遣官軍捕之仍俱奏

聞爾等尤宜公勤廉慎夙夜盡心以副委任毋徇  
情枉法縱釋有罪濫及無辜并遣勅諭禁 陝西  
岷州衛這多等族番僧頭目丹卜監藏烏思藏番  
僧着即堅藏等來朝貢馬 賜散馬罕回回打刺  
罕亦速等四十六人鈔絲幣表裏蘇衣等物有差  
日上生背氣一道色青赤鮮明

戊戌

四川馬湖府蠻夷長官司故長官文蘇子昌保等  
來朝貢<sup>方</sup>物 直隸保定府定興縣奏本縣逃民及  
充軍死絕人戶所欠地畝<sup>穀</sup>草七萬餘束今田稼

無收乞除豁

上命行在戶部除之

己亥

陝西河州衛番僧思曼藍監恭等來朝貢馬釋免  
工匠老幼殘疾二百七人

庚子

立春順天府官進春

上御正朝文武群臣行賀禮賜宴罷朝御左順門行  
在禮部尚書胡濙等侍

上曰獻歲發春生物之始人君當慎德行仁以承天

意卿等宜同此心輔朕不逮濙等頓首受命行

在戶部尚書郭敷奏在京文武官吏月俸折支鈔  
數多請自宣德三年十二月以前除山後無原籍  
者依例在京補支其餘俱令於原籍官司課程等  
項鈔內陸續支給從之 行在戶科給事中許侃  
等奏六科俱合增益板房如南京六科之制

上曰近日小有營建言者多謂勞民朕皆從所言已  
之况六科規制已定且歲終當息民亦姑已之  
行在都察院奏貴州道監察御史嚴士安受賕故  
出都指揮錢象死罪於律受賕枉法應死於新例



應運磚畢日為民命從新例 廣西總兵官都督  
僉事山雲奏率兵於慶遠府忻城等縣山峒擒獲  
賊首談團等斬首一千五百餘級歸所掠軍民男  
婦三百八十五人馬一十七匹

辛丑

陝西西寧衛等處刺麻綽受等廣西四州城女土  
官知州盧氏遣族人岑泰利州土官知州岑顏遣  
頭目羅嚮胡廣容美宣撫司黃萬通子陰保來朝  
貢馬及銀器方物奉使瓦刺都指揮毛哈刺等回  
京貢馬 賜朝鮮國使臣柳毅之等宴

勅致仕會寧伯李南哥曰卿自洪武初歸我

太祖高皇帝又事

太宗文皇帝是以

皇考臨御首進爾子英之官朕嗣位以來英以能擒  
戮強寇肅清道路以通使臣往來簡在朕心故屢  
進祿位錫以伯爵朕方委英以一方之寄今得卿  
奏云史昭有誣卿父子之言此必小人離間切不  
可信史昭但謂陳通誣之故追通與之辨理昭在  
法司未嘗半語及卿父子卿其勿疑况

朝廷明於日月豈容謬口誣枉善良茲已勅英總率

河洲等八衛之兵赴京想必在道卿宜安意善加  
調攝以副朕眷待之意後遣勅諭英曰此得爾父  
奏云為史昭構誣蓋昭至京未嘗一語及爾父子  
此言必出小人離間已勅卿父坦懷勿疑昭但謂  
陳通誣之故追通與之辦理爾父事我  
祖宗忠誠具著爾今事朕委任方隆亦非人所能間  
也爾當體朕至誠勿聽小人誑惑之語庶副朕之  
眷任 遼東總兵官都督僉事巫凱奏逃卒黃仲  
典高義畏避屯戍潛奔虜營與之交通今二人皆  
已就獲審問明白請罪之

上曰此卒向賊必將誘其寇違法不可容勅凱就軍  
中斬之以徇又勅凱曰人情誰肯樂從異類此必  
為將者不善撫恤又加暴刻有不能堪故往從寇  
自今宜戒飭諸將寬惠馭下毋失其心

壬寅

四川藍井衛土官千戶刺馬非遣舍人麥佐祀事  
抄撒等來朝貢馬 賜廣西田州府頭目黃聰等  
湖廣散毛等宣撫司舍人黃敬瑄等鈔絲帶表裏  
有差 夜有流星大如鷄卵色赤尾跡有光起外  
屏西南行至獨

癸卯

賜廣西思恩州土官舍人岑敬等湖廣砲南等宣  
撫司把事黃玘等前召南通萬戶府等衙門故土  
官舍人覃惠等鈔有差

甲辰

廣西奉議州署州事上官子黃宗蔭遣頭目黃潮  
等貢馬 內官阮其內使范台等私買僧牒改名  
逃往山西陀羅山為僧命鎮守山西都督李謙捕  
之行在戶部照磨康旭明奏南京浙江道監察  
御史尹循貪淫無行難居風憲歷陳其實

上命行在刑部執循治之 巡按山東監察御史包

德懷奏近廣寧曹莊義州等處竄賊屢入境殺虜  
人畜都指揮李信魯得等守備不嚴賊至又不率  
兵擊之請治其罪

上諭行在兵部臣曰違將失機當死姑令巡按御史  
責死罪狀罰俸一年再失機必殺不宥

己巳

勅行在禮部曰今歲事維新京師見任文武群臣先  
有過犯已發落者並與滌除罪名令改行自新遼  
東建州衛都督同知猛哥帖木兒違指揮僉事苦

禿毛憐衛指揮同知哈兒委等來朝貢馬及方物  
守備龍州都指揮僉事張貴奏交吐閃色新父  
子來歸已加撫恤與田宅但家口頗衆請以龍州  
食糧給贍從之

丙午

亦力把里回回打刺罕劉罕失等來朝貢馬

丁未

歲暮享

太廟

以明日正旦遣鄭王瞻坡詔告

長陵

獻陵

遣府祭五祀及旗纛之神

行在江西道監

察御史陳憲卒憲字廷章浙江定海人由進士擢

監察御史巡按湖廣江西莊重知憲體其在江西

政績尤著糾察方面及郡縣吏之賢否而去番之

悉公人用悅服南昌之民舊苦三司供給郡縣因

之以為己利憲悉革之民大稱快吉安守禦千戶

臧清貪淫亮恩殺人破家殆不勝紀都司受賂常

曲庇之按察司巡按御史維知之皆怯懦莫敢問

憲至廉得清殺一家無罪三人執訊引伏械送京

師一郡晏然舞牀於道化善政尚多既坤同官以

鞠獄出入相許者引憲初鞠為証俱集九部憲事  
已白以符覆奏未出然已有病時施禮後署部事  
寬而無制屬吏肆為奸弊凡死罪繫獄者悉得自  
便減清雖罪狀明白尚繫刑部獄未決夜竊至憲  
所詬詈捶擊憲憲忿恨竟卒於刑部于是公論皆  
咎禮後

上問侍臣曰聞御史陳憲能持身振憲紀今安在侍  
臣以實對

上深惜之自是不直禮後有告清他罪者立命磔於  
市 是歲天下戶口戶九百九十一萬六千八百

三十七口五千二百一十四萬四千二十一田地  
四百一十一萬三千一百三十七頃二十一畝田  
賦米麥三千二十四萬九千九百三十六石有奇  
絲一十七萬四千三十四斤綿二十二萬四千九  
百八十四斤絹九萬五千三百六十四疋布一十  
二萬八千三百九十三疋綿花二十三萬九千八  
十七斤折色鈔七萬五千四百五十九錠有奇雜  
課鈔一千九百一十七萬三千九百五十三錠米  
麥七萬九千一百一十七石銀六千九兩銅二千  
二百九十九斤鐵五十二萬九千七百五十六斤

有奇布二百八十三疋鹽課鹽三百五十二萬三千一百九十七引有奇折色鈔二千六百六十五萬五十九錠米六十八萬三千七百八十四石綿布七萬七千一百七十六疋茶課茶六十三萬八百五十六斤折色鈔一萬五千一十七錠有奇屯田子粒五百五十五萬二千五百七石採納金四百五十七兩銀一十九萬一千一百九十二兩水銀七千一百一十斤硃砂一千二百二十五斤石鉛三千五百七十七斤雄黃一百七十七斤有奇漕運北京米麥豆五百四十八萬八千八百石

免天下官田等項稅糧計米麥一萬一千八百六石有奇



